

民國五年重修

淮陽縣志

卷首 圖經

卷一

地輿志上

星野

沿革

表附疆域村保集鎮附山水

碑口附

卷二

地輿志下

古蹟

冢墓附

風土

卷三

籍賦志

戶口

丁地

征解

留支

蠲緩

雜稅

鹽引

卷四

建置志

城池

宮署

壇廟

坊表

橋梁

卷五

學校志

學宮
勸學所

學署
學額

學田

書院

義塾

卷六

經政志

秩祀

禮儀

兵防

郵政

倉儲

郵政

卷七

職官表

名宦傳

卷八

選舉表

辟舉

文武科目

封贈

貢生

世襲

學校畢業

恩廕

卷九

人物傳上

先賢

鄉賢

先正

文仕蹟

武仕蹟

卷十

人物傳上

孝友 忠烈

卷十一

人物傳上

義行

卷十二

人物傳上

文學 隱逸

卷十三

人物傳上

方技 耆壽

流寓

目錄

卷十四

人物傳下

列女 后妃

節婦

卷十五

人物傳下

列女 節婦

卷十六

人物傳下

列女 烈婦

孝婦

淑媛

貞女

烈女

孝女

卷十七

藝文志上

著述 金石

卷十八

藝文志下

輯類文

詔勅
祭文

表疏
誌銘

碑記

論辨序引

卷十九

藝文志下

輯類詩

賦頌
古樂府

古詩
歌詞

五七古

五七律

五七絕

卷二十

雜志上

災異

兵事

雜志下

方外

寺觀

志餘

淮陽縣志卷十八

志

藝文下 輯類文

詔勅 表疏 碑記 論辨序引 祭文 誌銘

詔勅

魏明帝雪陳思王詔

陳思王昔雖有過失既克己慎行以補前闕且自少至終篇籍不離於手誠難能也其收黃初中諸奏植罪狀公卿已下議尚書秘書中書三府大鴻臚者皆削除之

撰錄植前後所著賦頌詩銘雜論凡百餘篇副藏內外

唐德宗振恤陳州等處水災詔

朕以薄德託於人上勵精庶政思致雍熙而誠不動天政或多悖朕氣作疹暴雨薦臻自江淮而及於荆襄歷陳宋而施於河朔其

間都邑運有水災城郭多傷公私爲害損壞廬舍浸敗田苗或親戚漂淪或資產沉溺爲民父母所不忍聞與言疚懷良深惻憫因夜畏懼悼於厥心是用寢不獲安食而忘味時宜振恤庶治幽明今令中書舍人奚陟往襄陵郢隨鄂申光蔡等州左庶子姚齊梧往陳許宋亳徐泗等州秘書少監審咸往鎮冀德棣深趙等州京兆少尹韋武往揚楚廬壽徐潤蘇常湖等州宣撫一應諸州百姓因水不自能存者委宣撫使振給死者各加賜物所在官爲收殮埋瘞其田苗所損宣撫使與所在長吏具奏於戲一夫不獲一物失所刑罰不中賦斂不均皆可以失陰陽之和致水旱之沴其繫囚及獄訟久未決者委所在長吏即與疏辨務從寬簡俾伸冤滯貪官暴吏倚法害公特加懲肅用明典憲災傷之後切在撫綏咨爾方鎮之臣洎於官宰咸宜悉乃心力以恤凶災宣布朕懷

使各加悉

宋太祖修陵奉祀詔

歷代帝王或功濟生民或道光史載垂於祀典厥惟舊章兵興以來日不暇給有司廢職因循曠墜或廟貌攸設牲牷罔薦或陵寢雖存樵蘇靡禁仄席興念茲用惕然其太吳女媧炎帝黃帝顓頊高辛唐堯虞舜夏禹成湯周文王武王漢高祖後漢世祖唐高祖太宗十六帝各紹守陵五戶長吏春秋奉祀

明太祖諭陳州守將左君弼

曩者兵連禍結非一人之失予勞師累月與足下從事足下乃舍其親而奔他國是皆輕信羣下之言以至於此雖悔何及今足下奉君國之命禦彼邊疆與予接壤若欲獻計興師復境其中輕重未可量也且予之國乃足下父母之國合肥之城乃足下邱隴桑梓之鄉寧不思乎天下兵興豪傑並起豈惟乘時以就功名亦欲

保全父母妻子於亂世足下以身爲質而求安於人既已失策復使垂白之母糟糠之妻獨居寡處各天一方朝思暮望以日爲歲足下縱不以妻子爲念何忍忘情於老親哉功名富貴可以再圖生身之親不可再得足下能留意於是幡然而來予當棄前非仍復待以故舊則足下於天理人心舉無不順矣

明景帝遣官招撫河南流民勅

今聞河南開封府陳州等處多有各處逃來趣食流民或與本處居民相聚一處誠恐其中有等小人久則至於誘惑爲非難以處置今特簡命爾往彼處會同左副都御史王來及彼處三司堂上官並原專一撫治流民官員及巡按御史及本府州縣堂上能幹官平日爲民所信服者分頭設法小心招撫令各自散處耕種生理有缺食者量給米糧振濟無田種者量與田耕種務令得所宣

諭朝廷恩重使之警悟不許急逼致有激變又爲患害其中果有能體朝廷恩恤各散復業者量與免其糧差三年庶俾有所慕戀仍提督所在衛所官軍操練軍馬固守城池如有寇盜生發即令相機剿捕毋致滋蔓爾爲近臣受朝廷委命必須夙夜盡心以畢乃事不可因循怠忽有悞事機如違罪有所歸事安民安之時具奏俟命然後回京

表疏

救陳州刺史李邕奏

唐孔璋

明主舉能而捨過取才而棄行烈士抗節勇者不避死故晉用林父不以過漢任陳平不以行禽息殞身不祈生北郭碎首不愛死向若林父誅陳平死百里不用晏嬰見逐是晉無赤狄之土漢無天子之尊秦不彊齊不霸矣伏見陳州刺史邕剛毅忠烈難不苟

免往者折二張之角挫韋氏之鋒雖身受謫屈而姦謀沮解卽
有功於國且邕所能者拯孤恤窮救乏調急家無私聚今聞坐贓
下吏死在旦夕臣聞生無益於國者不若殺身以明賢臣願以六
尺之軀膏鈇鉞以代邕死臣與邕生平不欸曲臣知有邕邕不知
有臣臣不遠邕明矣夫知賢而舉仁也任人之患義也獲二善以
死臣又何求伏惟陛下寬邕之死使率德改行興林父曲逆之功
臣得瞑目附禽息北郭之迹大願畢矣若以陽和方始重行大戮
則臣請伏劍不敢煩有司皇天后上實聞臣言昔吳楚反漢得劇
孟則不憂夫以一賢而敵七國之衆伏惟敷含垢之道棄瑕之義
遠思劇孟近取於邕况告成岱宗天地更新赦而復論人誰無罪
惟明主圖之臣聞士爲知己者死臣不爲死者所知而甘爲之死
者非特惜邕賢亦以成陛下矜能之慈

爲夫請戍邊自贖表

李邕妻溫氏

妾溫氏言邕効職不謹狀涉貪狼逼迫囹圄獲罪以聞誠宜不待
刑書便當殞滅然事有所隱恐負明時天聞竄遠號訴不敢倉卒
之際分從嚴誅豈謂天鑒仁明邕得生竄荒外再造之幸上答何
階死罪死罪邕少習文章薄竊時譽疾惡如讐往往任捨遺奏張昌
宗之黨後參憲府劾武三思之罪坐此爲累不容於衆秉邪佞者
切齒攻文章者側目由是頻謫遠郡削跡朝端不見闕庭何啻十
載歲時凝戀聞者傷懷屬國家有事東岳大禮告成法駕西旋路
遵近境邕奉牛酒之獻各展臣子之心不意天澤曲垂恩私屬沐
邕當再躍何以爲心懇至夙誠冀遂申効妾聞正直見用佞邪生
憂邕之禍端自此爲始且邕比任外官竟無一議天顏暫顧罪則
旋生諺曰士無賢不肖入朝見嫉伏惟陛下明察此言妾之微軀

萬死無恨死罪死罪邕初蒙勅當即便禁身水不入口向逾五日
孤直援寡邪黨相趨窘急至深實不堪忍氣微息奄惟命是聽遺
邕手書事生吏口貸百姓蠶種抑稱枉法市羅以進令作贓私治
以爲能守此加罪當時匭使朝堂潛皆守捉號天訴地誰肯爲聞
嚴命將行棊往奔逐泣血去國沒骨炎荒長任欽州示以無用妾
願充邕一卒之用効力明時膏塗朔邊骨糞沙壤使得身死生王
事成邕夙心妾則碎首粉身萬死爲足妾夫婦義重當見其志不
避罪責冒死上聞倘天光垂照即當殞滅妾之榮幸實荷再生奉
表投進恩匭

上宰相魏元忠書

袁楚客

邑人

今皇帝新服厥德任官惟賢才左右惟其人因以布大化充古誼
以正天下君侯安得事循默哉苟利社稷專之可也夫安天下者

先正其本本正則天下固國之興亡繫焉太子天下本譬之大樹
無本則枝葉零悴國無太子朝野不安儲君有次及之勢故師保
教以君人之道用蘊崇其德所以重天下也今皇子既長未定嫡
嗣是天下無本天下無本猶樹而亡根枝葉何以存乎願君侯以
清晏之間言於上擇賢而立之此安天下之道曠而不置此朝廷
一失也女有內則男有外傳豈相濫哉幕府者大夫之職今公主
並開府置吏以女處男職所謂長陰抑陽也而望陰陽不愆風雨
時若得乎此朝廷二失也今度人既多緇衣半道不本行業專以
重寶附權門皆有定直皆之賣官錢入公府今之賣度錢入私家
以此道人徒爲游食此朝廷三失也唯名與器不可假人故曰天
工人其代之夫代天非才不可也代非其人必失天意失天意而
無禍患未之有也今倡優之輩因耳目之好遂授以官非輕朝廷

亂正法邪人君無私私怒害物私賞費財况私人以官乎此朝廷
四失也賢者邦家之光任之致治棄之生亂近詔博求多士雖有
好賢之名無得賢之實蓋有司選士非賄即勢上失天心下違人
望非爲官擇吏乃爲人擇官君洪有言舉秀才不知書察孝廉濁
如泥高第賢良者如鼃此朝廷五失也閹豎者給宮掖掃除事古
以奴隸畜之中古以來大道乖喪疏賢哲親近習乃委之以事授
之以權故豎刁亂齊伊戾敗宋君側之人衆所畏懼所謂鷹頭之
蠅廟垣之鼠者也後漢時用事尤甚晚節卒亂天下今大君中興
獨有閹豎坐升班秩既無正闕率授員外乃盈千人綰青紫耗府
藏前事之驗後事之師此朝廷六失也古者茅茨採椽以儉約遺
子孫所以愛力也今公主所賞傾庫府所造皆官供其疏築臺沼
崇峙觀廡山無本石木無近產造之終歲功用不絕夫爲君所以

養人非以害人今外戚不助養而反害之是使人主受謗天下此朝廷七失也官以安人非以害於人也先王欲人治必選材欲人安必省事此誠同天下憂也人有樂君共之君有樂人慶之可謂同樂矣如此則上下無間而均一體也今天下困窮州牧縣宰非以選進割剝自私人不聊生是有憂而上不卹也而更員外置官非助桀歟夫人情自以員外更恐下不已畏也必峻法懼之恐財不已奉也必枉道奪之欲不亂可得哉古語有之十羊九牧羊既不得食人亦不得息書曰官不必備惟其人此言正員猶難其備况員之外乎此朝廷八失也政出多門大亂之漸近封數夫人皆先帝宮嬪以爲備內職則不當知外不備內職則自可處外而今出入禁掖使內言必出外言必入固將弄君之法縱而不禁非所以重宗廟固國家孔子曰彼婦之口可以出走彼婦之謁可以